



Komunikadu Imprensa
25 Feveiru 2022
Parlamentu Nasionál

Uza Portugés hodi sukat kapasidade kandidatu ba Prezidente Repúblika la justu no kria bareira ba sidadaun ne'ebé la domina Portugés hodi konkorre ba Prezidente Repúblika

Komisaun Nasionál Eleisaun (CNE) hasai ona regra ida atu kandidatu sira ba Prezidente Repúblika tenke hatan ba pergunta Portugés ho lian Portugés. Objetivu mak atu sukat kapasidade kandidatu sira-nian tanba tuir Prezidente CNE, provizaun Artigu 75 Konstituisaun dehan katak tenke iha kapasidade natoon atu lori ita nia rain^[1]. Tuir kalendáriu debate kandidatu Prezidente Repúblika nian sei hahú iha 02 to'o 06 Marsu 2022.

JSMP haree katak mekanizmu ida uza lian Portugés ne'ebé CNE uza hodi sukat kapasidade kandidatu sira ba Prezidente Repúblika ne'e laloos, la justu no kria ona bareira ba sidadaun sira ne'ebé la domina lian Portugés atu konkorre ba Prezidente Repúblika mezmuke iha kapasidade atu bele ezerse funsaun no kompeténsia sira Prezidente Repúblika nian ne'ebé Konstituisaun atribui, dehan Diretora Ezekutiva JSMP, Dra. Ana Paula Marçal.

JSMP haree katak Timor-Leste iha lian ofisiál rua mak Tetun ho Portugés tuir provizaun alinea 1) Artigu 13 Konstituisaun RDTL. Nune'e, importante mak kandidatu sira ne'ebé konkorre ba Prezidente Repúblika ne'e bele domina entre lian ofisiál rua ne'e ida. Bainhira domina lian ofisiál rua hotu, ne'e di'ak liu tan.

Iha realidade hatudu katak iha xefe Estadu husi nasaun barak iha mundu ne'ebé bainhira halo vizita ofisiál ba nasaun seluk, inklui ba Nasoins Unidas sempre uza sira-nia lian ofisiál ne'ebé hatene, depois mak halo tradusaun ba lian internasionál sira. Kapasidade atu sai Prezidente Repúblika la sukat de'it ho lian. Mezmuke sidadaun ida domina Portugés ka lian internasionál ruma perfectamente, la signifika nia iha ona kapasidade hodi sai Prezidente Repúblika.

Alende ne'e, iha parte ida, maioria populasau hatene de'it lian ofisiál Tetun, bainhira ko'alia ho Portugés oinsa sira bele akompaña debate ne'e ho di'ak no sukat kandidatu ida nia kapasidade atu sai Prezidente Repúblika. Ida ne'e, sei fó

Rua Beco Lakateu, Aldeia Manufuik, Suku Kolmera, Administrativu Vera Cruz
Dili Timor Leste, PoBox: 275 Telefone: 3323883 | 77040735

Website : www.jsmp.tl

Email: ana@jsmp.tl

Facebook: www.facebook.com/timorleste.jsmp

impaktu mós ba sira-nia desizaun iha eleisaun mai. Nune'e, JSMP rekomenda ba CNE atu dada hikas fali regra ida ne'e atu husik kandidatu sira livre hili no uza lian ofisiál ida ne'ebé sira hakarak hodi halo debate.

Atu hetan informasaun liutan favór kontaktu direktamente:

Ana Paula Marçal
Diretora Ezekutiva JSMP
Telefone: 3323883
www.jsmp.tl